

С (Коми)
1096
~~42к~~



Г. ЮШКОВ
СӖСТӖМ ДӖРӖМ

Геннадий
Юшков

Состойм

ДОРОМ



Коми Книжной
Издательство
Сыктывкар 1965

С
Ю 96

ЮРИНДАЛЫСЬ

Сөстөм дөрөм	3
Чери	10
Надя да Лёзук	14

для младшего школьного возраста

Геннадий Анатольевич Юшков

ЧИСТАЯ РУБАШКА


на коми языке

Оформление *В. Н. Мамченко*

Редактор *В. А. Попов* Техн. редактор *А. Н. Вишнева*

Сдано в набор 3/XI-1964 г. Подписано к печати 30/XII-1964 г.
Формат 60×84¹/₁₆ 0,5 бум. л. 1,0 печ. л. (Уч.-изд. лист, 0,38)
Тираж 2000. Заказ 4916. Ц01849. Цена 1 коп.
Коми книжное издательство. Дом печати.

г. Сыктывкар, Республиканская типография
Управления по печати



Сөстөм дөрөм

Мамыс пасьтөдiс Васяөс сөстөм дөрөмөн да шуис:

— Талун өд он нин мун трактор дiнад?

— Ог,— нурбыльтiс Вася.

— Гораа шу «ог»-сө,— тшөктiс мамыс.

— Ог,— гораджыка вочавидзис Вася.

Мамыс эскана видзёдліс сы вылө да ачыс восьтіс керка өдзөссө. Вася тэрыба петіс ывлаө.

Тöрыт сійө лунтыр гурьясис трактор вылын. Трактористыс, Ёгор дядьö, весиг лэдзліс кутыштны рычагьяссө, кодьясөн веськөдлөны. Локтіс Вася гортас рытладорыс. Зэв өдйө пөрччис сьодасьөм дөрөмсө да дзебис крөвать улас. Мамыс кутіс чышкыны джоджсө да казяліс. Юаліс Васялысь, көні татшөма няйтөсьтіс. Ковмис висьтавны. Мамыс көсйис някыртны Васяөс юрсиөдыс, но сійө удитіс кайны паччөрө. Сэсянь и кывзіс мамыслысь видчөмсө.

Керкаяс сайын, ыб вылын, кыліс трактор шы. Қорсюрө тыдовтчыліс и ачыс тракторыс. Сы бөрся вөтлысисны ракаяс да скворечьяс.

Васяөс кыскис сэтчө жө, но эз лысьт муннысө. Сійө кайис потшөс вылө да асьсө ылөдлігмоз кутіс видзөдны мөдлапөвлань. Нинөм вылыс эз тыдав сэтысь: видзяс шыльквидзисны жө, вөрыс сулаліс сэтшөм жө.

А трактор заводитіс муравны нөшта ёнджыка, быттө дэльөдіс Васяөс, ышөдіс локны. Төдлытөгыс Вася нөжйөник бергөдчис ыблань чужөмөн.

— Бара нин трактор дум вылад?— горөдіс мыш саяс мамыс, кодлысь петөмсө Вася эз кывлы.— Мунлы сөмын!

Зонка чөв оліс, эз шыась. Мамыс сулалыштіс да мөдөдчис удж вылө.

Вася лэччис потшөс вылысь, лэптіс муысь чаг, шыбитіс сійөс. Мөд чаг лэптіс да шыбитіс. А коймөдысла дыш нин лои копыртчывнысө.

Трактор шы вочасөн шымыртіс Васяёс. «Муна да вөйыся кө, Ёгор дядьё эськө бара орччөн аскөдыс пуксьодас, веськөдлан рычагьяссө лэдзлас кутыштны, гашкө, ачыс весиг сэки мынтөдчылас. А дөрөмөс ог сьөдөд дай!»— мөвпыштіс Вася. Тайё мөвпыс и вөрзьөдіс сійёс местасыс.

Ёгор дядь казяліс Васяёс да сувтөдіс тракторсө, мыччысис кабинасыс:

— Бара локтін? Мамыд төрыт эз вид?

— Эз,— копыртіс юрсө да вочавидзис Вася.

— Но, эз кө, и бур!— шуис Ёгор дядь.— Пуксьы.

Мөдысь тшөктөм Вася эз виччысь, өдйё кайис трактор вылө, пырис кабинаас да пуксис Ёгор дядькөд орччөн. Ёгор дядь нюмъевтіс сылы да вөрзьөдіс тракторсө.

Муркаліс-ветліс ыб кузя трактор, корсюрө небыдика нетшыштчывліс. Куим амыся гөр вөтлысис сы бөрся, куим визьён гугөдіс лым улысь петөм руд мусө. Чим сьөдөн дзирдыштіс шонді водзын гөрөминис, өткымынлаті весиг лөсталис, быттьө выя бордйөн нуөдөмаөсь. Вералис гөрөм му весьтын сынөдыс, гы ва моз лайкьяліс.

Төрытъя моз жө Вася гусьөник нюжөдіс кисө да тшөтш кутчысис матыс веськөдлан рычагас. Ёгор дядь казяліс, но нинөм эз шу.

Рычагыс вөрис, быттьө мынтөдчыны зілис Вася кийсь. Вася кутіс чорыда, сөнъясыс килутш дорас весиг польдчыштісны зэлалөмысла. Қыліс, кызди вочасөн мудзис да сьөктаммис кийс.

— Оз өд пышйы, эн сэтшөма кут!— доровтис Ва-
сялань юрсө да сералигтыр шуис Ёгор дядь.

Вася личөдыштіс кабырсө. Пыр жө төдчымөн
кокняммис киис, вөснялісны килутш дорса сөнъясыс.

Дерт, эз Вася веськөдлы тракторнас. Кор ковмы-
ліс, Ёгор дядь ачыс кыкыштліс веськөдлан рычагъ-
яссө. Но Вася сюся кыйөдіс Ёгор дядьлөн кияс бөрся
да, мый удитліс, тшөтш отсавліс.

— Көсьян веськөдлыштны?— друг юалис тракто-
рист.

— Көсья!— радпырысь ышловзис Вася.

Ёгор дядь паськөдыштіс кокъяссө, сэсся босьтіс
Васяөс кыкнан киняулөдыс да пуксьөдіс пуклөс
вылө ас водзладорас. Вася пыр жө кутчысис веськөд-
лан рычагъясас.

Трактор ньөжмөдыштіс өдсө, сэсся бөр өддзөдчис.
Быттьө кык дөра, помтөм, лөз рөмаөсь, люзьгисны и
люзьгисны му вылө гусеницаясис. Öдйө матысмис
ыблөн помыс.

Вася шөйөвоши, мыш кузяяс йирмөг котөртис.
Мый вынсьыс чабыртіс веськөдлан рычагъяссө, кут-
кыртчис: тыдаліс нин ыб помын ваөн тырөм джу-
джыд гуран.

— Асланьыд кыкышт! Веськыдладорсасө ас-
ланьыд!— горөдіс Ёгор дядь.

Вася эз вөв сьөкыд пеля, велалис, но повзьөмысла
шөйөвоши да кыкыштіс асланьыс шуйгаладорса
рычагсө. Трактор сыркмунлі, ыръянитысь вөв моз
шыбитчис шуйгавыв. Сійө жө здукас Ёгор дядь кут-

чысис веськыдладорса рычагас да бөр веськөдіс тракторсө, а сэссия бергөдіс.

Вася чайтіс, мый Ёгор дядь вөтлас сійөс да водзө-вылө матө оз сибөдлы. Ас вылас скөрысла ёна доймытөдз курччис улыс вом дорсө.

— Төкөтьө кө, пышйис миян тракторыд!— серамсорөн шуис Ёгор дядь.

Васялөн личалі быдөн сьөлөм вылас.

— Сорасси ме,— яндысис сійө.

— Абу дивө! Он өд ме моз кызь во уджав,— кайтыштіс Ёгор дядь.— Но, веськөдлы! Гөрөм вылас со тракторыд пырө.

Вася кыскыштіс асланыс шуйгаладор рычагсө, и трактор бөр петіс гөрөм вылысь, кутіс мунны веськыдладор гусеницаяснас бөрөзда кузя.

Некымын кытшов вөчис Вася. Корсюрө Ёгор дядь тшөтш кутчысьліс веськөдлан рычагъясас. Сійө поліс на лэдзны тракторсө өтнас Вася вылө.

Вася зэв ёна көсйис, мед эськө аддзыліс кодкө челядь пиысь сылысь тракторөн веськөдлөмсө, но некод матын эз тыдав.

Кор зонка мудзис, тракторист бөр пуксьөдіс сійөс аскөдыс орччөн.

Пуклөсыс небыда лайкъяліс. Васяөс вугыр босьтіс. Сійө доровтчис кабина пельёслань да чөскыда унмовсис. Нинөм эз торк сылысь унсө — ни пуксөн узьөмыс, ни тракторлөн гора шыыс.

Садьмис Вася да чуймис: тракторыс сулалө, а кабинаас сійө өтнас. Видзөдліс трактор пөлөн, аддзис Ёгор дядьөс, коді кималасасис моторас.

— А-а, садьмин?— шпыньмуніс Ёгор дядь.—
А ме, аддзан, мыйта тэ узиг кості гөри!

— Мый нө лои?— юаліс Вася да чеччыштіс муё.

— Нинөм! Помала нин!— өвтыштіс кинас да во-
чавидзис Ёгор дядь.— На, кутлы!— мыччис Васялы
квайт пельёса неыджыд гайка да ичөтик болт.

Босьтігмозыс жө гайкаыс да болтыс вильснитісны
кисыс. Мед эз усьны муё, Вася зэв өдйө лөсьөдіс
мөд кисө да топөдіс морөс бердас. Сэтысь сэсся и
шамыртіс. Любө весиг лои, мый эз уськөд. Но ви-
дзөдліс морөс вылас да муртса эз бөрддзы: маслөөс-
сьөм дөрөмыс лөсталіс веж рөмөн.

— Вай,— корис Ёгор дядь гайкасө да болтсө.
Сійө пыр жө аддзис да гөгөрвоис, мыйла Вася жу-
гыль.— Аттө, маслөөсьтөмыд тай дөрөмтө!

— Мед,— шуис Вася да мырдөнсөрөн вөчліс се-
рамбана чужөм.

— Абу эськө мед да! Лоөма нин, да сійө-а!— во-
чавидзис Ёгор дядь.

Тракторсө лөсьөдөм бөрын сійө вөчис нөшта
некымын кытшов, сэсся лэччис пажнайтны. Вася лэч-
чис ськөд.

Керкаясыс Ёгор дядьлөн да Васяяслөн пөшти
орччаөсь. Та вөсна дзик горт дорөдзныс найө лок-
тісны өтлаын.

Вася мөвпыштіс: пыралас гортас да сөйыштас,
сэсся босьтас майтөг да лэччас вадорө, пєслалас сәні
дөрөмсө; рыт кежлас дөрөмыс косьмас, мамыс нинөм
оз и төдлы.

Но мамыс буретш вöлі гортас: пукаліс öшинь дорас да панясис. Сійö водздзык казяліс Васяös, петіс паньд кильчö вылас.

— Ой-ой-ой! Кутшöмös бара дөрöмсö вайö!— шуис мамыс да швачкис бокъясас кияснас.

— Ме öд эг нарошнö,— шайпаймуні Вася.

— Нарошнö көть эн!— горöдіс мамыс.— Ме тэныд шулі, буракö: эн, мися, некор мун трактор дінас. Шулі эг? Ок, ёна и нöйта талун!

— Энлы, энлы, Парук!— шыасис Ёгор дядь.— Нöйтнытö век удитан. А вот колö-ö нöйтны?

— Юрöдыс оз-ö ков таысь малыштны?— содтöд скөрмис Васялөн мамыс.

— А, гашкö, и колö! Тэнад пиьд уджö босьтчысь! Талун ме сылы тракторөн веськөдлыны нин сетлі,— висьталіс Ёгор дядь. Чöv олыштіс да содтіс:— Мөд-ысь, гашкö, кутшöм механизатор лоö!

— Ог тöд, мыйкö таысь лолö оз,— ыджыда ышловзис Парук.

— А ме шуа: лоö!— чорыда тöдчöдіс Ёгор дядь.— Татшöм зонпоснисыс и артмöны бур йöзыс!

Вася сюся видзöдліс мамыс вылö. Ёгор дядьлөн кывъяс бöрын мамыс лигышмуні-небзис, а вом дорас здук кежлö нум петаліс.



Ч е р и

Витя гудыртö гөп. Посни черияс кольчöмаöсь сэтчö тулыснас, ва усигас. Öнi найö чутмунлöны-зурасылöны Витялөн кокъясас.

Тöрыт сийö гудыртис жö öти гөп, кык ыджыд китыр кыйис черисö. Талун асывнас мамыс пöжалис черинянь. Пажун дырйи сёйисны эня-пия тайö чериняньсö.

— Со өд пиёй менё чериён нин вердө!— ошйысис мамыс йёзыслы.

Витялы зэв нимкодъ лолі.

Но өні сійё жугыль, завидь синъясён видзөд-
лывлө веретя вылө. Сэні чөвтöны ыджыд зорөд. Че-
лядь ваялöны сэтчө юръяс, панласьöны öта-мöдныс-
көд, збойджыкъяс весиг ньөръялöны вөвъяснысö.
Гөнитигас горзöны, быттьö кодкөдкө водзсасыны му-
нöны. Витялы окота жö юрсö кыскавны, но бригади-
рыс, Семö дядьö, оз сибөд: ичöt пö, усян пö вөв
вывсыс да дойман.

Гөптын ваыс гудырмис: содз и босьтан, а кыпы-
дөсьясыд оз нин тыдавны. Черияслы сьöкыд лои
лолавнысö, вылын юрөн кутісны ветлөдлыны ва вер-
көсöдыс. Витя лөсьөдчис кыявны. И буретш сэк
кодкө чукөстіс сійöс. Витя энөвтчис кыялөмсьыс, ви-
дзөдліс. Зорөд дорсянь öвтіс сылы кинас Семö дядьö,
корис сэтчө. Зонка öдийö петіс гөптысь да котөртіс ве-
ретя кузя.

— Аддзан кымöрсö?— индіс енэжö да шуис Семö
дядьö.

Вөр сайсянь кыпөдчис сьөд кымөр, джоджö кись-
төм ва моз паськаліс енэжас.

— Аддза,— вочавидзис Витя.

— Зэрмытөдзыс колö йылавны зорөдсö,— висьта-
ліс Семö дядьö.— Со Карко прөст сулалө. Пуксы да
тшötш кыскав юрсö. Верман он?

— Верма!— радпырысь эскөдіс Витя. Ачыс поліс:
а друг кө бригадирыс бөр вежас ассьыс думсö?

Зонка тэрыба кавшасис Қарко вылө, тракнитіс сермөд поводсө. Қарко эз вөрзъы, сөмын видзөдліс син пөвнас.

— Но!— горөдіс Витя да өвтыштіс поводнас өта-рө-мөдарө.

Вөрзьөмөн тшөтш Қарко мөдіс гөнечөн. Витя повзис, кутчысис вөвлы бурьяс. А паньд локтісны вөлаяс — челядь вайисны юрьяс. Мед не янөдны асьсө, Витя топөдіс мый вынсьыс кокъяссө да мынтөдчис бурьысьыс. Эз усь. Долады ышлолаліг, гөнитіс водзө.

Вит турун юр вайис Витя, эськө унджык на уди-тіс зэрмытөдзис, но эз коль сэсся юрыс.

Чөвтысьяс зілісны, коді кутшөма вермис. Вой-тасьны заводиттөдзис на эштіс зорөдыс. Ёсь вевта кузьмөс керка кодь лои.

Зорөд дорын сулаліс пашкыр пожөм. Сы улө и дзевсисны пуктысьысьяс, мед вывті не көтөдчыны. Медбөрын локтіс Семө дядьө. Сійө сибөдчис Витя-лань да гораа шуис:

— Молодеч! Аски кутан он кыскасьны?

— Кута!— окотапырысь вочавидзис Витя.

Гөп весьтын, кодөс гудыртіс Витя, лэбалісны ра-каяс. Зэрмигкежлад найө дзевсьывлөны жө кытчөкө, а өні быттө вунөдчөмаөсь: пуксьыласны гөп дорас да бөр невылө качөдчыласны. Весиг гымыштөмсьыс эз повзыны.

Друг ракаяс кутісны кравзыны лөкысь. Ставөн видзөдлісны сэтчань. Горш лэбачьяс мырддысисны сынөдас ыджыд чериөн, нетшкисны сійөс.

— Сир, буракö,— шуис кодкö.

— Сир,— дольыштис мöд.— Сыныд татшöм ичöт гöптад оз кольччы, кöть и йöрмас ямигад. Чеччалöмөн, а петас ыджыд ваад.

— Со эськö чериыд вöли, ачyd кö кыйин!— шыасис Витя динö Семö дядьö.

— Мед!— вочавидзис Витя.— Ньöти абу жаль. Сийö талун и сідз вöли шуда.



Надя да Лөзук

Надя — кукань видзысьлөн ныв.

Лөзук — еджыд кокъяса, лөз мышвыла кукань.

Надя мамыскөд частö воывлө картаö, отсасьö идрасьны. Сійö радейтö куканьяссö, но медся ёна радейтö Лөзукöс. А Лөзук радейтö Надяöс, мелі синьясөн видзöдö нывка вылö, век судзöдчö кыткö нюлыштны.

Тайо сөстөм йитөдыс чужи со кыз. Өтчүд куканьясөс лэччөдісны ю дорө. Лөзук сэк зэв на ичөт вөлі, но тшөтш вөтчис.

Енэжын дзирдаліс шонді, веськыда пөжис. Куканьяс йирсыштасны да пыраласны вао ыркөдчыштны, сэсся бара йирсыштасны да бара вао.

Пажун гөгөр Надялөн мамыс кайис гортас өттормөдтор вөчны: рыт-асывсө өд сійө оз эшты, а Надялы тшөктіс олыштны куканьяс дорас. Мыйыс оз вермы лоны накөд?! Локтас, шуам, кутшөмкө кукань буджөд дінө, а буджөдыс кырдаc, и усьө куканьяс.

Надя пуксис буджөдсянь неылө, кутіс өктыны гөгөрсьыс дзоридзьяс да кыны юркытш.

А мөдлапөвса вөр сайсянь лыбөдчис нин кык вевся кымөр. Надя сійөс казяліс, кор медводдза зэр тусьяс инмисны пельпомас да мышкас. Зэрмис зэв ёна, сувтсөн пондіс шливгыны. Куканьяс пырисны коз пуяс улө. Өти коз пу улө котөртіс и Надя, жмитчис ствол бердас. Сэтысь сійөс зэрыс эз босьт. А куканьяс вылын здукөн эз коль кос места: көтасисны да пөшти өткодь руд рөмаөсь лоисны ылысянныс. Йөжгыльтчөмаөсь ставныс, торйөн нин Лөзук. Сійө кадысь-кадө тірмунлө — сэтшөма кынмө. Надялы зэв жаль лои Лөзукус. Нывка пөрччис вывсьыс жакетсө, локтіс кукань дорө да плавкнитіс сылы мыш вылас. Лөзук дугдіс кынмыны. А регыд и зэрыс кобис.

Сэсянь Надя да Лөзук радейтөны өта-мөднысө.

Пырас Надя кукань видзан картаө да шуас:

— Лөзук!

А Лөзук небыда вочавидзас:

— Му-у!

Мамыс Надялы висьталіс, мый коркө Лөзукысь зэв бур мөс лоас. Та вөсна Надя нөшта нин төждысьө Лөзук вөсна.



1 кѡп.

КОМИ КНИЖНОЇ ИЗДАТЕЛЬСТВО • 1965